



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

Tir Yimyim

tiryimyim@aolima

tir yimyim

TAPAK 3

Sri Lanka Health Minister
mapa nungi anentsü

Taoba Assam Congress MP Sushmita Dev
TMC nung aden; Assam Congress aoksar



VOL. XVIII NO. 304 (ADOK 304) DIMAPUR

SANGTENNÜ (TUESDAY)

LUIROI (AUGUST) 17, 2021

₹ 5.00

COVID-19 Nagaland: 44 dak putet, 111 taneptsü angu & 4 asü

Kohima, August 16, 2021 (TYO): Hombarnü Nagaland nung COVID-19 agi shiranger nisung 111 taneptsü angu aser nisung 44 dak putet.

"Tesüiba ghonda 24 tsüingda COVID-19 agi shiranger nisung 111 taneptsü angu. Parnokji Dimapur nung 31, Zunheboto nung 28, Kohima nung 21, Longleng nung 9 Mokokchung nung 8, Peren nung 6, Phek nung 4, Tuensang nung 2 aser Kiphire o Mon nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-ia ashi.

Tanü taneptsü angurtem züingsema nisung 26,601 taneptsü nguogo aser iba jagi Nagaland nung COVID-19 nungi taneptsü angur 91.11% kümogo. Tang nisung 1,153 anepaludar.

"Tanü nisung 44 dak COVID-19 aliba puteta liasü. Parnokji Mokokchung nung 15, Kohima nung 14, Dimapur nung 11, Peren nung 2 aser Longleng o Mon nung kaka (1) lir" ta paisa ashi.

Hombarnü COVID-19 puteta alir nisung 4 asü. Parnokji Dimapur nung ana aser Kohima

o Mokokchung nung kaka liasü. Tanü asürtem züingsema nisung 605 süogo saka nisung 14 bo tanga tashidak ajanga asü, ta Dr Kikon-isa metetdaksü.

"Tang tashi nung COVID-19 alitsü akok ta temolung melemi bilemba sample 290,899 tendangogo. RT-PCR ajanga 104,988, TrueNat ajanga 71,461 aser Rapid Antigen Test ajanga 114,450 tendang" ta paisa shisem.

"Nagaland nung nisung 639,458 nem COVID-19 vaccine indang dose 807,872 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,838, healthcare workers 15,986, arishi küm 45 ser tempur 189,529 aser arishi küm 18 nungi 44 tsüingda alir 373,105 lir" ta paisa shisem.

"Vaccine agirtem rongnungi nisung 168,414-i dose anaprong agiogo. Parnokji frontline workers 42,098, healthcare workers 12,734, arishi küm 45 ser tempur 107,902 aser arishi küm 18 nungi 44 tsüingda alir 5,680 lir" ta Dr Thurr-ia metetdaksü.

Nagaland nung Aug 19 nungi Unlock-5 tenzüksü

Kohima, August 16, 2021 (TYO): COVID Nagaland atema high Powered Committee (HPC)-i August 19 nungi September 2 tashi Unlock-5 alitsü osang metetdaksüogo.

Nagaland nung Unlock-4 mapang Covid-19 'positivity rate' ajema kümogo. Unlock-3 mapang 10.57% aliba tang 10.06% ajemogo.

Deobar tashi nung Nagaland nung nisung 29,151 dak COVID-19 puteta liasü aser iba nungi nisung 26,490 taneptsü nguogo. Tang nisung 1,224 anepaludar aser 601 süogo.

"Chief Minister Neiphiu Rio menden ser HPC senden amendang August 19 nungi September 2 tashi Unlock-5 alitsü telemtetba agi" ta Planning & Coordination, Land Revenue and Parliamentary Affairs Minister, Neiba Kronu-ia ashi.

"Unlock-5 nung sorkar office tem nung ketdangsur 100% aser tanga mapa inyaker 50% arutsü melar" ta Information Technology, Science and Technology, New & Renewable Energy Advisor, Mmhonlumo Kikon-ia metetdaksü.

Nagamese oshi nung COVID-19 SOP sayaogo

Dimapur, August 16, 2021 (TYO): August 16, 2021 nü Dimapur Deputy Commissioner, Rajesh Soundararajan, IAS-i Nagamese oshi nung meyipzükba Covid-19 SOP on Covid-19 Containment and Management sayatsüogo.

Iba ya Peri-urban, Rural aser Tribal Areas atema Ministry of Panchayati Raj, Government of India ajanga adokba li. Tanü Dimapur DC indang conference hall nung SOP sayaa liasü.

Iba sentong nung Project Director, Kethosituo Sekhose, NCS-i anir DRDA Dimapur ketdangsur aser staff tem aser District Administration

ketdangsurtem den ADC Dimapur nungertem aden.

"Nagamese oshi nung SOP meyipzükba ajanga nisungtem aser talisa yimtsingtem nung alirtem kanga ajangzüksü. DRDA Dimapur-i iba mapa tajung inyakba atema tenüngsang agütsür" ta Deputy Commissioner Rajesh Soundararajan-ia ashi.

"SOP meyipzükba mapa nung P.O, DRDA aser staff ajaki shilem agiba atema pelar" ta Project Director, Kethosituo-ia ashi.

Kasa sentong nung DRDA Dimapur-i DTF Dimapur nem Oxygen Concentrator, PPE suits aser N95 masks agüja liasü.

NSEE-2021 Merit List sangdonger

Dimapur, August 16, 2021 (TYO): Nagaland nung Directorate of Technical Education-i NSEE-2021 Merit list sayaogo.

NSEE-2021 Merit list ya Department indang Website: www.dtenagaland.org.in aser Office Notice Board nung angutsü.

Nagaland United Government kümtetogo; Cabinet melenshitsü akok

Kohima, August 16, 2021 (TYO): Nagaland nung political party ajaki Nagaland United Government (NUG) bangzüng nung sign asüba sülen tanaben opposition maliba sorkar ka kümtetogo.

Iba ya Naga yimten teblemetsü maparen nungita yaritsü tangatetba nung bangzüngtepba lir.

2015 küm opposition Congress MLA 8-i NPF den loktepba sülen Nagaland nung opposition maliba sorkar ka küma liasü.

"People's Democratic Alliance (PDA) nung adener telok ana-Nationalist Democratic Progress Party (NDPP) o BJP den Independent MLA ana aser opposition party Naga People's Front (NPF) tsüingda Opposition maliba United Government kümtetsü telemtetba agiogo" ta tanü Minister Neiba Kronu-ia ashi.

"Opposition maliba sorkar dang Nagaland United Government (NUG) ta ajatsü" ta paisa metetdaksü.

"August 11 nü NDPP aser NPF külem senden ka amendang NPF-i opposition maliba sorkar ka akümtsü teblemeba lemsatetp. Külen, BJP lennirtemia iba atema telemtetba ka agi aser Hombarnü Chief Minister indang Residential

Office nung külem bangzüng nung sign sütep" ta Kronu-isa ashi.

NUG bangzüng nung MLA 9-i sign asü aser parnok rongnung Chief Minister Neiphiu Rio, Deputy Chief Minister Yanthungo Patton aser Opposition Leader T R Zeliang aser NDPP party president Chingwang Konyak, BJP party president Temjen Imna Along aser NPF party president Dr Shurhazelle Liezietsu nungertem dena lir.

Iba bangzüng nung adenerem ya 2018 küm Nagaland State Assembly Election nung toktepba political party tem lir.

Naga yimten teblemetsü atema telemtetba agitsü atema MLA ajak longjemtsübaji kanga tongtipang aser iba telongjem ajanga alizüng tongtetsü ta political party temi bilemer.

July 19, 2021 nü T R Zeliang-i aniba NPF Legislature Party-i Parliamentary Committee on NPI pusema nungittsü aser iba nung shilem agitsü telemtetba agia liasü.

NPF-isa Naga yimten latetba nung yariteptsü atema parnoki PDA den Opposition maliba sorkar ka akümtsü pusema nungit.

Nagaland nung political party temi onük pungu aliba bangzüng ka resem aser iba nung yimjung

bener arutsü aser tejakleni aotsü atema tangatetba tajung nung Naga yimjung olemtep nung yariteptsü ta asüba onük dena lir.

Parnoki Naga yimtenren telok ajak dang longjemtsü aser putepshitsü atema mepishia metetdaksü.

Nagaland nung political party temisa India sorkar aser olemtep nung adenba Naga yimtenren teloktem dang tekaratiba nung telemtetba ka agitsü atema ayongzük.

NUG bangzüng nungsa ajaki agizükettetsü telemtetba ka agitsü atema külemi longjemer noktaksü telemtetba agiba shia lir.

"NPF-i Naga yimten teblemetsü dak sendakba maparen nung yariteptsü atema tatemzükba kecha melii sorkar nung adener ta shiogo saka Chief Minister Rio-i NPF MLA tem anioktsü atema ministry nung nübo melenshitsü mesüra tanga aliba ama dang aotsü atema telemtetba agitsü. Ajsiüaka, kobi melii ministry nung temelenshi kar asütsü akok" ta Minister Kronu-ia metetdaksü.

Külen osang ka ajanga angazükba agi NPF MLA ana cabinet nung shimoktsü akok.

Nagaland United Government (NUG) ketdangtsüa aotsü atema Mongulbarnü party ajak senden ka amentsü ta osang ajangasa ashi.

Shillong nung curfew atsülanger; HNLC tanishir tepsetba bushisüngdangtsü

Shillong, August 16, 2021 (Agencies): Meghalaya yimtiba Shillong nung tensa mesüngjemtetba atema August 18 anepdang 5:00 ako tashi 'total curfew' alitsü atsülangogo.

August 13, 2021 nü Hynniewtrep National Liberation Council (HNLC) general secretary Cherisherfield Thangkhiw tepsetba sülen Meghalaya nung tensa mejungi akum.

Hombarnü Meghalaya Cabinet-i Cherisherfield Thangkhiw tepsetba tatalokba bushisüngdangtsü telemtetba agiogo.

"August 13 anepdang atalokba osang metetsü atema State Cabinet-i Commission of Enquiry Act kübok bushisüngdang asütsü telemtetba agiogo" ta Meghalaya chief minister Conrad Sangma-ia ashi.

Külen, Meghalaya sorkarisa Peace Committee ka tentetsü telemtetba agi. Iba Committee nung mendenbubaji Meghalaya Deputy Chief Minister Prestone Tynsong asütsü aser minister H

Dohling o minister R Tongkhar na züingsem asütsü shimogo.

Peace Committee nung civil societies, tamangba yimsü teloktem aser lokti lennirtem shimoktsü.

State sorkarisa taruba ghonda 24 atema 'mobile internet ban' maneni alitsü osang metetdaksüogo.

Deobarnü State Home Secretary CVD Diengdoh-i district pezü- East Khasi Hills, West Khasi Hills, South West Khasi Hills aser Ri-Bhoi nung ghonda 48 atema internet & telecommunications service shibangtsü tetuyuba agüja liasü.

Meghalaya nung security aser law & order atema sub-committee ka tentetogo. Iba nung mendenji CM Conrad Sangma asütsü aser deputy CM Prestone Tynsong o state home minister na züingsem asütsü. Iba ludeni law & order, lendong ataloktsüba maparen aser Meghalaya Police ketdangsubaren repringshitsü.

Home Minister Lakhmen Rymbui-ia tatalokba atema

teblemetsü khuret bena mapa nungi anen saka Meghalaya chief minister Conrad-ia iba atema repringshimsü ta metetdaksüogo.

Cheristerfield Thangkhiw ya HNLC tenteter rongnung ka liasü aser pa 2018 küm temai adok. HNLC-i IED ka pokdaksüba sülen anogo asemnü lir Mawlai nung Cheristerfield ya par kidang police-i khaset.

Ajsiüaka, par kinungertemibo pa ya police-ia asaa khaset ta tai tongloktsür.

Pa tepsetba atema Deobarnü Shillong kübok tesem aika nung nisungtemi tejashi sayua ozüing alema mapa inyaka liasü.

Cheristerfield tepsetba atema Meghalaya Human Rights Commission (MHRC)-isa state sorkar dang nungi telangzüba meshiogo.

Ano, Delhi nung amenoka aliba NGO Rights and Risks Analysis Group (RRAG)-ibo Cheristerfield tepsetba ken o ya Central Bureau of Investigation (CBI) nem bushisüngdang südaksütsü akhanger.

TPO-i political party ajak longjemba pelaa agizüker

Dimapur, August 16, 2021 (TYO): Tenyimi Peoples' Organisation (TPO) indang Executive Council-i Nagaland nung political party ajak longjemba pelaa agizükba metetdaksüogo.

Indo-Naga yimjung olemtep nung yariteptsü atema Nagaland political party ajak longjemba

pelaa agizüker aser parnoki Naga nung tarutsü tia ajungtsü atema inyaksü ayongzük, ta TPO-i sangdong ka nung ashi.

"Naga nung putiotsü aser maitsü atema kümzüka ayutsü atema inyaker anungji Naga National Flag den külemi noktaker kechiyong iba ya Naga nung maitsü aser putiotsü

indang tamaitsü lir" ta TPO-isa metetdaksü.

Eastern Nagaland (Myanmar) nung aliba Naga nungeri timtem ajuruba aser tetsüba tia ka nung aliba atema temolung raksar. Onoki parnok pusemer aser Naga nung ajaki parnok yaritsü ayongzük, ta TPO-isa ashi.

Govt. High School nungi HSLC nung temaba jenjang angur tushi



Dimapur, Luroi/August 16 (TYO): Kohima District Planning and Development Board (DPDB) ajanga Government High School nungi temaba jenjang nguteter nem tetushi agütsüba sentong, 13th HSLC Examination Topper, 2021 ya DPDB indang Conference Hall, Kohima nung August 16, 2021 nü ayongzüka agia liasü.

Basanti Devi-i takok tajung ngutetba aser tarutsü nung la doctor akumtsü tejangraba aliba atema sentong nung Advisor, Urban Development and Municipal Affairs, Dr. Neikiesalie Nicky Kire ajanga pelaba lemsatepa liasü.

Temolungtetba aliba aser bendanga agütsüba ajanga takok angur, ta pai ashi aser la dang medical field nung lenmang tejangja aser tim shimteta azüngtsü ajungshi.

Government High School

Kohima nungi taküm HSLC tatidang nung tematiba jenjang ya Government Higher Secondary School, Jotsoma nungi Basanti Devi-i nguteta liasü, aser lai o tatsüka jembiba mapang la takok anguba atema la tesayur aser tsürabur dang pelaba lemsatepa liasü. Lai Science stream shimteta tarutsü nung doctor akumtsü tejangraba aliba indang shia liasü.

Sentong nung Vice Principal GHSS Jotsoma, Megosevi Kuotsu-i jembiba mapang, iba sempet agütsütsü asoshi School aser Basanti shimteta ya tepelatsü mapang ka lir, ta ashi aser DPDB Kohima ajanga Government School tem nungi kaketshirtem ajungmesoba atema pelaba lemsatepa liasü.

Basanti ya tashi angaba, meranga inyakba aser bendanga agütsür azüngba kaketshir ka lir, shibai Class

VIII mapanga Government School tem nungi tematiba jenjang ngutetba asoshi District Award agüja liasü, ta pai ashi.

School ya 2014 küm Higher Secondary School-i ajungketa Arts aser Commerce stream lapok aser iba sülen 2020 tashi secondary aser higher secondary result nung tamakok ajurur shinga meliasü aser HSSLC Examination 2020 nunga topper ka liasü, ta Megosevi-i ashi.

"Tanük HSLC aser HSSLC Examination nung ajakibo takok mongutetaka top 10 jenjang nung nisung anati Class 12 (Arts) nung top 6 aser 9 jenjang nguteta liasü, ta pai ashi.

Iba sentong nung Basanti Devi indang tsüraburtemia jembiba. Iba sentong nung ADC Kohima, N. Bhavani Sri. IAS menden liasü aser DEO Kohima, Neizetuonuo ajanga tepela ankep o jembiba liasü.

State sorkar Tribal Hohoden senden amentsü ayonger

Dimapur, Luroi/August 16 (TYO): Cabinet senden ka August 10, 2021 nü amendang lemtetba ama Tribal Hoho tem den senden ka August 18, 2021 (Bodhbar) anepdang 10:30 ako nungi tenzüka State Banquet Hall, Chief Minister's Residential Complex, Kohima nung amentsü.

Iba senden nung jembitsüba onüktem yamai alitsü:

- Peren aser Dimapur district tsüngta arütsü latettsü dak sendakba nung Zeliang aser Zumi kin tetsüngtai aitsü atema.
- ULBs nung tetsürtem asoshi menden wazüka

yutsütsü atema.
c) Naga Customary Law nung aliba ama obendang agütsütsü asoshi Naga Tribunals atema.
d) Urban area nung Gaon Buras (GBs) tem shimtsü atema. Iba senden nung Chief Minister, Deputy Chief Minister Nagaland, Speaker, NLA, Leader of Opposition aser Minister ajak alitsü.

Iba senden nung Members of Parliament, Rajya Sabha, aser Lok Sabha, Advisor ajak aser Nagaland Legislative Assembly nung züngsem ajak iba senden nung arua adentsü metetdaksü.

Kohima DPDB senden menogo



Dimapur, Luroi/August 16 (TYO): August ita asoshi Kohima District Planning and Development Board (DPDB) pur senden DPDB indang Conference Hall, Kohima nung August 16, 2021 nü menogo, kong Deputy Commissioner & Vice Chairman DPDB Kohima, Gregory Thejawelie, NCS menden liasü aser iba senden nung Advisor, Urban Development and Municipal Affairs, Dr. Neikiesalie Nicky Kire dena liasü.

Iba senden nung taoba senden telemtetba lepa reprangshi aser Deputy Commissioner ajanga Village Adoption Committees ajunga dang pei sentongtem yanglua tekeratiba nung inyak tenzütsü nenshia ashi.

Kohima district kübok 'public parks' yanglutsüba dak sendakba nung sorkari taoba mapang jangjateta aliba Botanical Garden, Kohima aser Nagaland University Campus, Meriema asoshi iba senden nung onük benoka jembiba aser ADC Kohima telolakba sür züngsem tenet agi akumba committee ka tenteta DPDB ajanga agizüker sorkar nem agütsütsü asoshi detail project proposal yanglutsü nungloksü.

Kohima jila kübok özüng

alema tzü pipeline mesangba aser plastic mamshitsü indang senden nungya jembiba, aser iba dak sendakba nung 2019 küm district administration ajanga department balala aser colony ketdangsür den lungjemer tesem balala mita aoba indang DC ajanga shia liasü.

Ajisiüka tang tashidak wara aliba tensa ya ajanga taoba küm iba mera ya tanen makai meinyaktet, anungji nokdanga aliba plastic oset aser tzü pipeline tem tanaben temai adokba angur, ta ashi.

Iba dak sendakba nung tatsü-talang jembiba sülen mapang shidak nung tapet mera agitsü lemteta liasü. Iba senden nung tzü pipeline tim yimya nung amshitsü asoshi achayangtsü atema committee ka shimteta liasü.

Senior Treasury Officer, Kohima, Vechiso Chakhesang ajanga senden nung Government Accounts nung tongtipang yimya, accounts telemasa, teyari tanaben meshitsü asoshi yimyatam angazükba aser index of classification nung PowerPoint presentation agüja liasü.

Taruba DPDB senden nung Social Welfare department nem par department inyaksangshi indang osang agütsütsü nungloksü.

MOVCDNER Phase III kübok FIGs 21 tentetogo



Dimapur, Luroi/August 16 (TYO): Himalayan Ecosystem nung aluyimer tashi ulushidaksütsü asoshi Centre of Learning, Knowledge and Services (COLKS) ajanga tejangraba tulu nung küm trok inyaka arur. Yimya tasen balala ajanga yimdam yimtsüngtem nung aliba aluyimer yaritsü tangatetba nung COLKS ajanga maparen balala inyaka arur.

Küm aika COLKS yagi nükjidadong tongtettsü mechi sorkar department aser lokti tentet balala den lungjemer sentong balala ayongzüka inyaka arur. Tawa Dimapur nung COLKS indang kongsang ka lapoka Mission Organic Value Chain Development - North Eastern Region (MOVCDNER) Phase III mapa kuma inyaksü asoshi Department of Agriculture asoshi Service Provider ka ama inyaker.

COLKS ajanga Phek, Peren, Kiphire aser Wokha district tem nungi aluyimer tem lungjemdaksütsü aser süngmok, jenjang-menjang, large cardamom aser king chilli amala tsünütsü asoshi training agütsütsü. Aluyimer nem parnoki küm asem tsüngta ICS Management & Certification, Branding, Labelling, Quality Control nung training agütsütsü, Awareness Campaign ayongzüksü aser MOVCDNER Phase III plan kübok Market linkages agütsütsü.

District pezü shia nungi Farmer Producer Company (FPC) kaka tentettsü nükjidadong yur item maparen ya inyaksü.

COLKS ajanga sentong ka ayongzüba nung company aser MOVCDNER Phase III plan indang metetpelaba agia liasü. Iba sülen COLKS team ajanga FIGs aser FPCs tentetba indang

rateta ashi.

Iba mapang Marketing Linkages junga maliba amala aluyimer temi timtem ajuruba indang jembiba aser COLKS ajanga sentong aser tasa balala sayua liasü.

Tang tashinung COLKS ajanga Phek district nungi FIGs pongu tenteta lir, aser item ya Kami aser Santheri yimtsüngtem nungi aluyimer dena tentet. Kasa mapang Peren district nunga Old Tesen, New Tesen, Ndunglwa, Peletkie aser Lekkeiram yimtsüngtem nungi FIGs 15 tenteta liasü. COLKS ajanga yimtsüng tenet nungi FIGs 20 tashi tentetogo.

COLKS yagi anogo 20 tsüngta parnok indang Ecosystem nung adentsü asoshi aluyimer 2000 dak tema den MoU züluteptsü lir aser aluyimer tem MOVCDNER Phase III plan nung shilem agitsü teimla lir.

Hindi Teachers 2012-15 batch Dimapur ajanga metetdaksür

Dimapur, Luroi/August 16 (TYO): Asenok mapa nung shimokba 'Appointment Order' ya regular yimya nung süka mapa nung shimoker tang tashi itasen mapang shidak nung mangur aser itasen mangu ita trok jungogo, ta Hindi Teachers 2012-2015 batch, Dimapur Unit ajanga sangdong ka nung ashi.

Iba dak sendakba nung 'physical verification' maparen tembanga tashi atatsü, ta Hindi Teachers 2012-2015 batch, Dimapur Unit pur August 14, 2021 nü senden amendang lemteta liasü, ta ashi.

Iba physical verification maparen tembanga sülena

tangutsü tim itasen mapang shidak nung magütsüra, asenoki mera kar agitsü, anungji züngsem ajak iba physical verification maparen tembangdakja süngjema atatsü mepishir, ta sangdong ajanga ashi.

Iba dan sendakba nung senden amendang lemtetba ama tsünglanglen agüja alirtem den osang ola agitepa alitsü metetdaksü.

- Sherhinlo Keppen - 8413065283
- Lima - 6009196101
- Kevi - 7005819124
- Toshimanen
- Vikai.

SÜR KÜM KA AJUNGBA MENUNGRA BILEMTETER


Teti meima aliba Oba, nai onok toktsür oor tanü küm ka ajunger. Nabo jangratemtsüka, shisatsü nung takar, Tesayur tajung aser sobaliba bentet-benteta sayuba tebu liasü-a-nei!

Tematiba nung nai onok dang Tsungrem akümtsübutüsü sayu. Ali mapa tembangba anogo nua onok dang akümüli taküm alidang zünga zülutsü, sarasademtsü, longjema alitsü aser mapang tajung alangzüka alitsü koda tongtimbang sayu.

Oba, nabo alakteta tajung liasü. Onoki na taküm asoshi kanga pelar. Kodanga tain makümba lima, teti tepela lima nung temeimba purtem den lir ta meteta temulung anisüngzüker.

Onoki na kanga menungrar.

~Chirnur, Anükapang & Semchirtem.



Lt. Dr. Guru Sademmeren Longkumer
16th October 1927 ~ 17th August 2020.

GOVERNMENT OF NAGALAND DIRECTORATE OF HEALTH & FAMILY WELFARE NAGALAND: KOHIMA

No. DHFW-5/TRG/PMTI/2019/4835-38

Dated, Kohima, the 13th August, 2021.

ADVERTISEMENT

In pursuance to Govt. approval No.HFW(A)-12/121/2021/831 Dated, the 12th Aug.2021, interested candidates from bonafide Indigenous Inhabitants for the State of Nagaland are invited for undergoing DMLT 2 (two) years course at Para Medical Training Institute Kohima for the session 2021-2022 as indicated below.

1. Minimum and maximum age for admission will be 17 years and be less than 25 years of age on the date of commencement of the course.
2. Applicant should have cleared HSSLC (10+2) Science stream from a recognized University or Board of Examinations with pass marks in Physics, Chemistry and Biology.
3. Application Form duly filled up along with necessary documents duly self attested may be submitted along with the Schedule Tribe and Indigenous Inhabitant Certificate which is compulsory for all while submitting the form.
4. Number of seats for DMLT 20(Twenty) seats.
5. No separate calling letter will be issued.
6. Application Form and Prospectus can be downloaded w.e.f.18th August 2021 from the Department Website: nagahealth.nagaland.gov.in
7. Last date of submission of Application Form(s) online shall be 26th August 2021. Duly filled in application in PDF format along with requisite supporting documents should be submitted through email to: govt.pmti@gmail.com
8. There will be no written examination, candidates shall be selected purely on the basis of Academic Merit Marks as per the marks obtained in 10+2 Science final examination.
9. No Application Forms will be issued from the Office.
10. Incomplete Application, if submitted will be rejected summarily.

SD/-
(Dr. Neikhrhelie Khimiao)
Principal Director
Dte. of Health & Family Welfare
Nagaland, Kohima.

Issued by DIPR

Meghalaya nung Assam truck driver ka tepset

Shillong, August 16, 2021

(Agencies): Meghalaya kübok West Jaintia Hills nung Assam nung truck driver ka tepseter lia angu.

Tasüsangji Karimganj district nung Duhalia nung alir Dharendra Das'er jabaso Alak Das ta jangjatetogo.

Driver (Alak Das) tepsetba maparen nung dena alir nisung ka West Jaintia Police-i pua lir, ta osang ajanga ashi.

FCI FSD Jowai kima anena yur aliba truck telung nung mejanga orr aliba mapang nisung anati Alak Das tepset.

Iba lendong atalokba tesem (FCI FSD Jowai kima) nungi kilometer 5 shi pila orr Alak tasüsang ngua liasü.

Anup Truck Transport Pvt. Ltd. nungi transport FCI, Jowai indang contractor, Jesse Dkhar-i iba lendong anema FIR ka

benokogo aser bushisüngdang tenzüokogo.

Hombar (16.09.2021) anepdang 2:14 ako meta mejangjaba nisung telok Alto gari ka nung arur truck (TR 01-AG-1689) aya aser parnok rongnung nisung anati iba gari bener oadok. Iba mapang nungi Alak Das mengui aküm, ta FIR nung shia lir.

Hombar anepdang 2:14 ako meta driver Nilay Nath ajanga phone nung iba lendong indang osang angazük, ta J Dkhar-i metetdaksü.

Alak Das ya FCI indang jang abenba aliba truck anishir liasü aser pa den phone ajanga jembitsü merangdang, saka pa indang phone switch off liasü, ta Dkhar-isa ashi.

Osang angazükli dang Nilay Nath den lendong atalokba tesem Khlichtyrshi jagi aritepa ao aser Jowai jila matongdang iba truck

apu, ta Dkhar-isa metetdaksü.

Iba lendong dak sendakba nung Jowai police dang osang agütsüba mapang, Dkhar-i 4 Mile Mihmyntalu tashi iba truck sülen anidaka ao aser weighbridge anasa iba truck anentsü akok ta bilema tanaben iba truck sülen anidaka liasü.

Dkhar-i truck nung mena alir ana rongnung nisung ka apu saka ka jena oadok.

Dkhar-i apuba nisung ya indang indanga Jowai police station nung agütsü aser pa police ket nung lir.

FCI jang ayatsü tebilemba nung nisung tepseta aser truck auyar ajenba tatalokba ajanga nüburtem aoksadaksüog.

August 14, 2021 nikongdang 4:29 ako meta Guwahati anasa FSD Changsari nungi iba truck nung jang oshir liasü, ta truck indang chit' nung shia lir.

GOVERNMENT OF NAGALAND DIRECTORATE OF HIGHER EDUCATION NAGALAND : KOHIMA

NO. HED/HOST-1/2016

Dated : Kohima the 16th August 2021

NOTIFICATION

It is hereby notified to all those who have applied for Eligibility Certificate for opening of new Hostel that the inspection will be conducted from 19th - 21st August 2021.

All the proprietors are requested to extend co-operation to the inspection team deputed by the Department.

Sd/-

(Dr. APENI LOTHIA)

DIRECTOR

HIGHER EDUCATION.

Issued by DIPR

Taoba Assam Congress MP Sushmita Dev TMC nung aden; Assam Congress aoksar

Guwahati, August 16, 2021

(Agencies): Taoba mapang Assam Congress MP Sushmita Dev-i Trinamool Congress (TMC) nung denogo.

TMC lennir tejentem Abhishek Banerjee aser Derek O'Brien nati Sushmita Dev pela agizüka liasü.

All India Mahila Congress president aser taoba Silchar MP, Sushmita Dev-i Congress party toktsü.

Dev-i iba party (Congress) nungi anenba metetdakja lai All India Congress Committee (AICC) president Sonia Gandhi dang tezüluba ka agütsü.

Lai Congress party indang 'primary membership' nungi anen. Sushmita Dev-i iba telok toktsüba ajanga Assam indang Barak Valley nung Congress nungi tongtimbang lennir ka mali kümogo.

"Indian National Congress indang primary membership nungi ni anenba ama iba shidi agizükangma," ta Deobarnü taoba Silchar MP Sushmita Dev-i zülü.

Taoba mapang osang ajanga angazükba agi, taoba Congress MP aser Union minister Santosh Mohan Dev'er jala Sushmita Dev-i Bharatiya Janata Party (BJP) nung adentsü ta asadangteta liasü.

Taoba Lok Sabha MP Sushmita Dev-i party toktsüba atema aoksar ta Assam Congress-i Hombarnü metetdaksü.

"All India Mahila Congress president inyaka lia Sushmita Dev-i party toktsüba atema



Sushmita Dev (File photo)

Assam Pradesh Congress Committee aoksar" ta APCC Media Department Chairperson Bobbeeta Sharma-i ashi.

"Dev-i AIMC president ka ama India ajungalen Congress tetsür lakh aika len ania liasü. Congress party-i la dang nungi iba ya kodanga meimlai liasü" ta Sharma-isa ashi.

"Congress-i lanurtem adentsü ajungmesoa aur aser la lanur asidang nungi MLA aser MP inyaksü maongka agüja liasü" ta laisa shisem.

La ka Congress lennir tajung asür Santosh Mohan Dev'er jala lir aser Indira o Rajiv ama lennirtemi len ania Barak Valley aser Assam nung pa anitet. Sorkar ketdangtsü tashi maliba nung ajemdaker party toktsür maotsüla" ta Sharma-isa metetdaksü.

"Party tasenba nung lai takok angutsü onoki moatsür aser lai nendansga public tenzüksü imlar" ta APCC Media Department Chairperson Bobbeeta Sharma-isa metetdaksü.

Shillong nung nisung kari CRPF amak

Shillong, August 16, 2021

(Agencies): Hombarnü Shillong kübok Mawlai tesem nung nisung kari CRPF sepaitem amak.

Lungkak aitba telok senshidaktsü atema tanü sepaitemi tashiyim amshitsüa aküm.

Shillong nung curfew aliba mapang iba lendong ataloka liasü. Lungkak aiteremi CRPF gari nung lung agi aon.

Independence Day anogomung mapang Shillong nung nisung tamajungeri tashiyim agi mapa tamajung

inyakba sülen Meghalaya sorkari Shillong nung 'Total Curfew' alitsü sangdongogo.

Ano Deobar aonung, nisung kari Meghalaya chief minister Conrad Sangma'er kidang petrol bomb pokdaksü.

Yasung 10:15 ako meta CRPF gari amakertemi Third Mile nung chief minister Sangma'er kidang Molotov cocktail bottle mereploktsü.

Mezüng bottle ji CM'er ki tejaklen mereploktsü aser bottle kaji par ki tesülen mereplokja liasü. Ajisüaka, tiaka iba lendong nung shinga meyrur.



TIR YIMYIM YIMOBILEM (EDITORIAL)

DIMAPUR SANGTENNÜ, LUROI(AUGUST) 17, 2021

Sannükertem melentepa nükdaktsüba

Asenok Aortem asoshi dang masü saka Naga nungertem ajak asoshi arogo ya kanga tongtibang tamendakdak long ka kümogo. Arogo jungra lokti aser yimtena ajungtsü ta asüba jenjang ka nung Naga nungertem alir, anungji arogo nung lenirtem ya yimten aser lokti lenirtem dang nungi tashi aser khuret tuluba abenertem lir. Arogobo Tsüngrem meyong saka yimten aser loktijibo alima meyong, anungji arogoi yimten aser lokti madak Tsüngrem ain tashi amshia moatsütsü, arütsütsü aser metongshitsütsü akok saka yimten aser lokti tentettemibo arogo madakbo yimsü mesütettsü. Atangji, aiben asenoki arogo dak tezü tepo mali ta jembir, tetezü arogoi yimteni inyakba ama ozüng amshiabo meinyaktettsü ta ashirba, saka jungjunga bilemdangra, yimten dak aketba tezü aser tepo dangbo arogo dak aketba tezü aser tepoji tashitaitba aser techiraba lir, kechiyong arogo dak aketba tezü aser tepojibo Tsüngrem ain aser tashi lir. Iba tashi ainji amshia Tsüngrem santem nüksütsüsbaji sannüker tajung ka asoshi jangratemtsü mapa lir. Atangji, alima nung alir nisung dang asünungji, sannükba mapa inyakaka, sannüker ajak dakbo sannüktsü sempeta malitsüa akok. Sannükba mapa ya temela masü, aonungbo manüktsü mesüra mapang majungdangbo manüktsü ta mali saka mapang majung dangang temulung tagütsüba anüktsüsa akümer. San anükba mapa nungji timtem aser nungsen dang masü saka lendonga lir saka sannükeri santem asoshi taküm bendanga agüja menükra, anogo shia santem samatsü ana nung lir. Ano santemji ajak ka amadangbo masü, anungji san shia tenüng aser yimyaji meteta sannükeri chirema anir jajatsüsbaji kanga tongtibang akümer. Item santemji arogo nungertem lir. Arogo nung adenba tetezüji, shiba südirsüaka, pa mesüra la mulungjang nung Tsüngrem teyari aser temoatsü aginüba tetzüraba ka lir, ibaji meteta arogo nung sannükeri kotak nung aliba sannükeri tulutiba dang nungi santem nungdakji meshia agütsütettsüla. Ibaji arogo nung amangba purtem ajak asoshi tanüla chiyongtsü manna akümer. Tanü asen lima nung iba manna jagi kanga anünger. Aji oda, shi azü chiyongtsübo peria angur saka tanüla chiyongtsü agibo kanga anünger ta asüba mapang ya, tamangerbo tamanger saka pei tamangji mapa agi mesayutet asenok rongnung lempet tamanger aika kümogo. Item timtem aser tashimait tenzükba tesemtemji yanglushia tashi itshitsü atema sannükertem asentenshitsu kanga nungdaka kümogo aser iba denji külemi, tangar kintemji yutsür, asenok ABAM kübok aliba Ao Baptist arogotem nung sannükertem shimba aser inyakbaren ya melenshi nunga koma süla ta sa bilemer. Iba jagi taoba hopta nung asenoki iba osangkaket nung, " ABAM kübok arogotem nung sannükertem ya ABAM-i shimer mapang mapang shia, government mapa nung inyakertem amato, mapang apir arogo balalai transfer aser posting yoka tenzükdaktsü nunga koma süla ?" ta asüba tebilemba onük nung shisalemsatepogo. Atangji, karibo ABAM-i lim arogo nung inyaktsü sannüker shimbaji junger, anungji arogo ka nung küm terer inyakdaktsütsüla ta shidangogo. Atangji, asen lima nunga tamangertem telongjem karibo yamaji inyaker aser alima nung Khristansa süaka tanga Khristan teloktemia kasa inyakyim nung sannükertem longlonga arogo balala nung küm ishishi inyakdaktsür. Iba amaji kodang inyakdir, talangka azüngba mazüngba kecha mali, sannükertem ajak ita sen kasasa angutsü. Aji oda, arogo kari magütsütetra tang agütsüba ama, ABAM-i asemtsüa akok. Ano kodang yamaji melentepa inyakdir, arogo kar nungbo nisung agi laker tanüla nung tezüdangtep alua aliba mapang sannükeri tasen ka yokba jagi arogo nung asentenshi adoktsü. Ano, sannüker asoshia küm metsü semer taliba tesem ka nungsa kasa santem nüka alitsüsbaji talaktsüka akümer, anungji sannüker asoshia arogo tasen melena tesem tasen nung san tasentem den alitsüsbaji taküm nung jangratemtsü mapa aser mapang tasen ka ajurur asütsü. Atangji, iba inyakyim nung ABAM ajanga sannüker shimtsü aser mapa inyakdak tesem bushia yoktsüsbaji khuret tulu asütsü, saka inyakyim dang shitak latetra, khuret agi temoatsü kuma melamelaa inyakettsü. Iba jagi arogotem tali longjemdaktsütsü aser ABAM khuret aser tashi tuluba akümstsü.

OLEMSABANG

Sen Aputepba aser Arogo Tangatetba

- Akok Amer

(Yashi adok nungi...)

Ali Rongsen Koda Amshitsü?

Tanü asenoki sen-o-tsü amshiyim ya ajak atemabo kasa külizüng jagi magütsütetter. Peter Temin-i yamai ashir, "The presence of interest-bearing loans informs us only about one way of raising funds for someone seeking to start or expand a business activity." Kar tang iba maparen nung tajangzük angur saka aikati iba kasa takok temeten mungutetter. Asen lima nunga item interest amshirtem aika ajangshia arogo. Küm balala nung investors aruagi asen kibong mesüzüka sen talang meshia interest khen anaben agütsügo. Saka iba ajangzük to koda asü? Manger mesangwa tsüngda samatok aser asen kibong aser kija takumbo talila renloktsü melena takoksa nung karbo kibong teraksa tia aoba ngua aruogo. Interest angutsü melena sentsühang tali tsülok. Balaluyu, sentsüh yong ki-o-jen ayokba aser society balalai asen ki rakzükdaktsüba (mortgage) tanü tashi benshia aruba ajangshia arudaki.

Interest nung sen amshiba ya kecha küli magütsütetba maparen ka lir. Kechiyong sen apua kibong nung terenlok bilemba ama inyakteter aser tepela samadaktsür. Iba nung ochi mali aser tebandang (inequality), telemsatop dang bener arur.

Lai tekong kar nungbo mapa kar atemabo interest agitsü indang shia angutsü aser kari ashir ibai temeshi ozüng, tatishitsü agi Tazüngkumen 23:19 nung yamai shia lir "Nai ne adianu dang tetemlok keter, sen nung tetemlok süshia' chiyongtsü nung mesüra kechisarena nung tetemlok keter maputsütsüla." Iba tekong nung jangja jangja shi angutsü adianu dang temeshi saka teratatsü kaji, tekong 20 nung yamai shia angutsü, "Bendanger nem nai tetemlok agi aputsütsü akok; saka koba lima nai agitsü aor, idakji nai inyakba ajak nung kibuba ne Tsüngremi na moatsütsü asoshi pei adianu nem nai tetemlok keta maputsütsüla." Kasaji Tazüngkunem 28:12 nunga angutsü. Sen teyari atema teyari atema telemlok aser ochi mashi tetemlok agi tangar a sentsütsür kümdaktsüba anaji tepila metettsüla.

Yangi kechiba adianu aser bendanger na bendanga amshir? Yihuda nung o Yihuda nung tsüngdabo tamshi aji temenen (unlawful/not of the divine) ta züngshir. Yisui ashibato bilemtetdi, "Nai ne kiyonger pei ama meinang" (Mathi 19:19). Sürabangla, kiyongerji aenera alitsü, ajak dangbo kasa adianu dang masütsü. Kodang memeshiba ta südir joko adianutem dang masü, saka kiyongertem/aenertem (Gentiles) ajak dang kasa ozüng agütsüba südi.

Tasen Lai nung talisa Mathi 25:27 nung shia angutsü, "Anungji sen rezünger ket nung nai kü sen yutsütsü tim liasü, aser ni arudang kü meyong dak tetemlok keter ni meyipa ngula." Kasaji Mathi 5:42; Luk 6:34-35, 38; 19:22-23, nung angutsü.

Hindu yimsü nunga temaba caste ana tsüngda mamshitsü ozüng nung lir: Bhisma-i Mahabarata nung ya shia lir, 'They who betakes themselves to improper conduct, they who take exorbitant rates of interest, and they who make unduly large profits on sales, have to sink in hell.' Islam yimsü nung aser Khristan yimsü nung pei adianu dang tetemlok meshitepa amshibaji ozüng anema lir ta shia angur, saka lia arudang iba ozüng to samadok aser unconditional ka dang aküm. Khristan yimsü nung mezüng yongi temeten amshitsü mali asü, saka Yisui Lai nung melaba ama aener nem aputsütsü (without interest) indang shia angutsü aser kodang aji aputsüdir, parnok nungi meyipba angutsü teyimla (do not expect) ta shia angutsü. Kechiyong Yisui shinüsbaji, shibai nungdakba purtem, sensakertem yarir Tsüngremi nenok nem meyipa moatsütsü. Idakji, sen tetemlok meshiang ta shia mali, saka yariang dang lir.

Otem

Khristan yimsü nung tetemlok agiba ya temenen aser majunga ta mapang talangka nungi jembia arur. Medieval age mapang nung, tetemlok amshitepba ya alima economy tsütsü nungi masü saka Khristan arogotemi aser tenzükertemi "including Pope, took interest without any hesitation" tarendak kecha makai tetemlok meshia aru. Parnoki tetemlok nung joko temulung agütsüa teinyaktsü ka meinyaki aru. Reformation mapang Martin Lutheri akhanga nokdangbaji, ali rongsen aser sen agi tekümtet malizükettsü ta shia kuli asü. Kechiyong (Pope) tenzükertemi tekümtet ayoktsüsa aküm (sales of indulgences). Ibayongji modern age nungi tanü tashi tetemlok amshibaji nokdanga arur. Yihuda nung ama kodang pei adianu dangbo memeshitsü saka aenertem dang meshiti ta südir idakji, lendong tulu lir. Kechiyong Yihuda nung talisa Grik nungeri tetemlok enoka apuba sen magütsütetba yong temulungjang meshiba William Shakespeare otsü kaket nunga zülua angutsü: "Antonio, an antisemitic merchant, takes a loan from the Jew Shylock to help his friend to court Portia. Antonio can't repay the loan, and without mercy, Shylock demands a pound of his flesh."

Yihuda nung Shylocki bendanger Antonio nem sen aputsü, iba sen pa agitsü atema masü saka medemer Portia yaritsü atema aputepa o bendang dak agütsü. Saka kodang bendanger (gentiles) nungba tuagi magütsütet Antonio mang nungi shi portion ka meshi. Kasa shi mang nung memeshiaka tanü asen aortem aika pei akaba ali rongsen: ki, alu, farm ajak rakzükadoker talidak makai kümadoktsügo nih!! Aiatai.

Laishibai melaba ama nai ner kiyonger meimtsü asoshi kechi tajung inyaktsüla? Adianu tsüngda kechi koda yaritepa arur iba amaji meima yaritepa alitsü ashir masü na. Asen lima nunga kari yimya süba-a sen apuba lir, kar koda masüba yong aputepber, kar rongsen amshitsü mashiba yong kibong nung senpong tapok dang alir. Tsüngremi asenok dang nungi akhangbaji mapa meranga inyakba ya lir. Anungji, na aser ni koba tia nung Tsüngremi asen nem rongsen tera agütsür ibaya kümdanga amshitsü, aser tangar dang apua taküm alitsübo tejangra aser tera dang süaka asen yari nung asena alitsü asünung Tsüngrem tenüng sanga temoatsütem amshitsü merangdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristan telok balalai Haiti nung menoknok agi kongshirtem yarir



August 14, 2021 nü Haiti nung menoknok sashia anokba ajanga Les Cayes nung aliba Sacred Heart Arogo Tenla ki raksaa aliba noksa nung angur.

August 16, 2021: Honibarnep (August 14) Haiti nung menoknok magnitude 7.2 nung anokba sülen tasü mang 300 angu; iba menoknok ajanga Tenla kitem densema building meyirjang aika chirepogo; Amongnü nikongdang tashi nungbo tasü mang ajak senteper 1,297 nguogo aser nisung 5,700 dak tema yiruba jangjaogo.

Iba lendong atalokba sülen Khristan telok balalai teraksatsüba asadanga den külemi iba lendong agi kongshirtem nem teyari agütsüdar.

Osangbenertem den jembidang Les Cayes nung aliba Episcopal Arogo nung tongti putir, Abiade Lozama-i, "Yimti yimdong nung asatepba ola tulu liasü. Nisungtemi pei kibong züngsemtem bushiteper mesüra medical teyari balala bushiteper," ta metetdaksü.

Les Cayes nung school tem tanaben lapoktsü atema putir, Lozama-i tesayurtem aser tsüraburtem den senden amenba mapang nung menoknok anoka liasü.

Honibarnep 8:30 ako meta Petit Trou de Nippes jila nungi mile 5 shi pilar menoknok anok, iba sülena aiben anoka liasü, ta USGS-i metetdaksü.

Putir Lozama-i, "Nisungtemi pei kinüngertem ata aser teyari ata-a liasü. Iba ama lendong atalokba mapang nung nisungtemi linük dak teimla akar, Ajisüaka teyari mangu," ta ashi.

2010 küm nunga Haiti nung menoknok lendong nung nisung 300,000 dak tema asü.

Khristan aid telok-Compassion Haiti-ia parnoki timtemertem yaritsü atema renemshidar, ta metetdaksü.

Evangelical aid organization World Vision nung national director, Marcelo Viscarra-i, "Menoknok agi teraksatsüba ano official süa masadang. Onoki tang wara (coronavirus) den raraba den külemi 'Grace' yipru atema renemshidar," ta metetdaksü.

World Vision-i nisung 6,000 shi nem teyari balala agütsütsü atema supplies bener aoba den külemi teraksatsüba

asadangtsü aser kanga nüngdakba kibongtem yaritsü atema parnok staff tem Les Cayes-i yokogo.

Christian child sponsorship organization- Compassion International-ia parnok indang Facebook page ajanga, menoknok agi kongshiba tanurtem aser tsüraburtem yaritsü atema parnok indang disaster response team yokogo, ta metetdaksü.

Adventist Development & Relief Agency-ia Saint-Louis de Sud nung menoknok agi kongshiba nisungtem yaridar.

ADRA emergency management coordinator, Elian

Giaccarini-i, "Talisa onoki yirua alirtem yaritsü meranger. Tang onoki timtem ajurubajimenoknok ajanga ki chirepba agi lenmang mokdanga aliba ajanga onoki lendong agi mejungi kongshiba tesemtemi mouteter. Onoki 'Grace' yipru atema-a tsübur. Iba dak alia Haiti nung rara ajanga tang tensa mejungi lir aser nisung aika jenshia lir. Tang tensa kanga mejungi lir," ta metetdaksü.

Taoba ita Haiti Tir, Jouvenal Moïse tepsetba sülen tang linük nung yimtenren aser rongsenketsüung tsütsü timtem tulu lir.

Yaküm nungi Haiti nung ozüing alema inyakba kanga bulua kümogo. Taküm February ita nung Haiti nung United Nations Integrated Office-i, tesüiba ita 12 tsüingda linük nung nisung puer aoba tatalokba 234 liasü aser ibaji taoba küm dang nungi shilem 200 agi timba lir, ta metetdakja liasü.

2020 küm Haiti nung nisung 1,380 tepseta liasü. Tang iba linük nung ozüing alema inyaker telok 150 dak tema lir, ta watchdog group Fondasyon Je Klere-i metetdaksü.

ANO GO ABEN TSÜNGREM DEN

Tuoshi nung tepela

"Kechiaser ni asoshi taküm alibaji Khrista aser tasütsüji tajangzük lir." Filipi 1:21

Martin Burnham aser kinungtsü Gracia ya Philippines nung missionarytem liasü. Tena kibong kümer küm 18 ajungbamung nü, kiralongrartem arua parnok pua ayu. Tepuokdak anogo 376 lir külen, June 7, 2002 nung pa tepset saka kinungtsübo chiok. Parnok tepuokdak aliba mapang nung, aonung shia arem min nungji süngdongzüng nung parnok alenoka ayudang, Martin yagi, pa apurtem tenük nung ranglokli aser, "Kanga pelar" "Aonung Tajung" ta sa ashi. Kinungtsüi ashiba agi la kinungbui iba amaji inyakbaji kechiba ta sürbang, pa asoshi mapang tamangtiba nungjia pai Tsüngrem tsüngdang pelaa linü. Tanü item kiralongrar rongnungi, apuani kati Tsüngrem tenzüksü mulungteta inyakdar aser ano arem min nung Missionarytem anir senzürtem rongnung tu, 4 tamanger kümer lir. Gracia-i ashiba agi "Tsüngremibo ajak inyakteter. Ashiko martin küna painü tepuokdak aliba aser pa asüba ajanga, item nisung mulungjang nung Tsüngremi mapa inyak südi".

Asenokia shisadangdi. Iba amala tiaji asenoki ajuru nung asenokia Paul aser Martin nunger amaji agizüktettsü asü masü? Asen tia aser mapang tamajungtiba jia Tsüngremibo pa sentong tajungtiba ka atema amshitettsü koka lir.

SARASADEM

Kibur Tsüngrem, nia tia ajak nung ni ne tsüngdang pelaa aser tashi angaa atatsü kü nem tashi agüjangma. Amen

Afghanistan nung Khristantem reshikangshi tamajungba akümstsü

August 16, 2021: Tang Taliban kiralongrartem Afghanistan linük agiba mapang nung iba linük nung Khristantem kanga shisabulu tenzüko.

Afghanistan nung Khristantemi mimshia dang Tsüngrem külemer aser tang Taliban teloki iba linük agiba ajanga Khristantem reshikangshi ano tamajungba akümstsü, ta osang ka ajanga metetdaksü.

Taliban teloki Kabul nung Tir ki agiogo aser tang parnoki tongtibang yimti aika densema linük shilem tulubaka agiogo.

Taküm July ita nungi US aser NATO sepaitemi iba linük toktsür aoba sülen Taliban teloki linük agiba ajanga Khristantem, talisa tetsürtem aser tanurtem tamajungba kongshitsü.

Taliban teloki Herat aser Kandahar yimti na agiba sülen tang linük yimtiba agitsü atema apusuogo, ta Afghanistan toktsür jena oa Rome nung alir Khristan, Ali Ehsani-i metetdaksü.

Paisa linük yimtiba, Kabul nung mimshia aliba Khristan kibongtem rongnung kibong kati timtem tulu ajangshiba lemsatöp.

Ali Ehsani ya tangbo arrshi küm 32, aser pai züluba kaket "Tonight we look at the Stars" (Italy oshi) nung Taliban kiralongrartem aser pai ajangshia arubatem zülua lir. Iba kaket nungji 1990s mapang pa arrshi küm 8 dang astüngdang



Taliban teloki Afghanistan agiba sülen iba linük toktsür ajentsü atema nisung aika Kabul airport nung adenshia aliba noksa nung angur.

par ki raksatsüba aser par tsürabur makai akümiba indang zülusema lir.

Kabul nung Khristan kibong kati ajangshiba lemsatöpä pai, "Kabul nung iba kibong denji ni teti tongtepratepa liasü. Anogo ana tejaklen iba kibong nung tebuti süogo. Pa kidang nungi ayazüka aoba sülen kidangi tanaben meyipa maru. Linük yimtiba nung rara tulu adoka lir; parnoki pa Khristan ta meteta tepset asütsüa akok," ta Ali-i metetdaksü.

"Tang pa kinungtsü aser tanur pongu kanga tsübu tesem ka nungi kati jenshia senzüdar. Parnoki linük toktsür jena oner, ajisüaka parnok yarir mali.

Parnok yaritsü atema ni lenmang bushitsüdar. Ni Pope Francis nem iba osang ya metetdaksüner," ta paisa ashi.

Tesüiba küm aika Afghanistan nung Khristantemi timtem kanga ajangshia arur, ta pai ashi.

"Kabul nung Tenla kitem mali, anungji hopta ishika tejaklen ni Italy nungi video call ajanga tekülem sentong nung parnok dendaktsütsü meranga liasü. Parnok kanga pelaa liasü. Ajisüaka tesüiba anogo 15 tsüingda tensa kanga melenshiogo, aser tang parnok taküm lendong nung lir," ta pai ashi.

"Ni asoshibo, tang

Afghanistan nung tatalokbatem ya kü taküm nung yiruba zübo tanaben aketba amai lir," ta pai ashi.

"Central sorkari tang aliba tensa mazüokteter. Ano külen Pakistan, Iran aser China linüktemi senotsü aser yimtenren tsütsülen nungi Taliban kiralongrartem yarir, aser ibaji Kabul nung bendangertem samatsütsü nükjidong nung inyaker," ta pai ashi.

"Alima linüktemi ola madoki malitsüla aser Taliban telok pusemertem anema inyaktsüla. Afghanistan nunga nisung ajak tesünep nung litettsüla aser peii melungba yimsü amangtettsüla," ta paisa ashi.

OLONG PAITEP # 5908

1		2		3		4	5			
				6						7
		8								
9				10		11				
			12						13	
						14				
16						17				

- | | | | |
|----------------------------|-------|--------------------------------|-------|
| TIPIEN | | LANGTSÜNGLEN | |
| 1. Nisung jenti | - (5) | 1. Tenük telong | - (9) |
| 4. Tsük rudenba | - (5) | 2. Committee dang ajar | - (5) |
| 6. Temzüng tesashi | - (5) | 3. Yagi ki okdoker | - (7) |
| 8. S_ _ _ i | - (3) | 5. Yim lenmang | - (5) |
| 9. Nisung rongnung telemsa | - (3) | 7. Temoatsü keter meyipa aruba | - (9) |
| 10. Anogoshi | - (4) | 11. Kanga junga menemba | - (7) |
| 12. Ajanga aor | - (4) | 12. Kenyongi majinü | - (5) |
| 13. Tsük rizüngdak | - (3) | 13. Rong kanga tulu | - (5) |
| 14. Tebang nungi adokba | - (3) | | |
| 16. Süngdong tatembangtiba | - (5) | | |
| 17. Meputep | - (5) | | |

OLONG PAITEP # 5907 TELANGZÜBA


- | | |
|----------------------------------|--|
| TIPIEN : | LANGTSÜNGLEN : |
| 1. Tanga, 6. Wara, 7. Rajang, | 2. Anga, 3. Yabang, 4. Tarok, 5. Orak, |
| 9. Anük, 10. Jenjang, 11. Alar, | 8. Ainer, 9. Anema, 10. Jabili, |
| 14. Ngashi, 15. Nala, 16. Mechi. | 11. Among, 12. Miim, 13. Anem. |



TANÜBO NAI LANGZÜANG

Q. Taoba U.S. Tir shibai 'Navy and Marine Corps Medal' angu.
 A. John F. Kennedy B. Ronald Reagan
 C. Dwight Eisenhower D. Jimmy Carter
 _____ (Taruba adok nung onoki langzüsü)
YASHI ADOK TELANGZÜBA : Netherlands

AO OSHI ANGAZÜKDAK:
TANÜ ANGAZÜKTSÜBA OJANG



Kongki
 (n) kenten dang ola tapu balala adoka atemba oset (musical instrument)
 * Arogo nung lanurtem asoshi **kongki** tapu aika nungdaker.

Kongmesü
 (n) tekong nung mesülokba sü (necktie)
 * **Kongmesü** mesüba agi nisung akhümketdaksür.

NAI-A YA METETTER MA?

- JULY 2021' NUNG SAYABA KEN KAR:**
 (Yashi adok nungi...)
- Post Malone - "Motley Crew"
 - Zac Brown Band - "Old Love Song"
 - Camilo & Shawn Mendes - "KESI (Remix)"
 - Iron Maiden - "The Writing on the Wall"
 - MASN - "Don't Talk"
 - Mavi Phoenix - "Tokyo Drift"
 - Alewya - "Spirit_X"
 - Brandi Carlile - "Right on Time"
 - Citizen Soldier - "Always December"
 - Dan Bull - "Losing, Moira Leechin"
 - Khalid - "New Normal"
 - Will Young - "Strong"
 - Alesha Dixon - "War"
 - SebastiAn - "Don't Tread on Else Matters" ft. Metallica
 - Ed Sheeran - "Bad Habits (MEDUZA Remix)"
 - Sean Kingston - "Love Is Wonderful" ft. Travis Barker
 - Natasha Bedingfield - "Adorable"
- 

SUDOKU # 5949 TELANGZÜBA # 5950

3	9	1	8		4				3	9	5	2	1	7	4	6	8
	5							9	7	6	4	3	8	9	1	5	2
				5	9			8	2	8	1	4	5	6	9	7	3
		4				7			4	7	9	5	6	2	8	3	1
		3					1		5	2	8	9	3	1	6	4	7
9	5		3	2		6	4		1	3	6	8	7	4	2	9	5
8				6	3	5		2	8	5	2	6	4	3	7	1	9
			2	4			7		6	1	3	7	9	8	5	2	4
4	3		7	1	5				9	4	7	1	2	5	3	8	6

OJANG LUTEP # 5494

- SETEM :
- RKA :
- UNGNBO :
- OATSTEMÜ :
- URAJUR :
- SÜMA :
- TETIMM :
- LENGANDONG :
- TSÜAJURUSA :
- SÜTIATR :

OJANG LUTEP TELANGZÜBA # 5493

**SAYUBENTSÜ TAJUNG MANGABA TANURJI TSÜRABUR
 TEJAK NUNG ANAK TEPLOKTSÜR DANG**

TAN HOPTA ATEMA - KOMA SÜLA ?

Q. Clean election takok angutsü atema voter shia dangi "ni' vote mayoktsü" ta sign südaktsüyonga Signature campaign sentong ka agia ao nunga koma süla ?

IAF tayimtsü ajanga Afghanistan nungi India nunger anir arutsü



August 16, 2021 nü New Delhi nung security sepaitemi Afghanistan Embassy anükba noksa nung angur. Afghanistan Tir, Ashraf Ghani-i linük toktsür ajenba sülen Taliban kiralongrartemi Afghan presidential palace agiogo.

New Delhi, August 16 (Agencies): Indian Air Force (IAF)-i parnok indang tayimtsü ajanga Afghanistan nung aliba India nunger aser ketdangsertem anir arutsü; tang Afghanistan nung India nunger ketdangser aser security staff 500 shi lir.

Afghanistan nung aliba Indain Embassy aser staff tem dak sendakba nüngdak balala jembitsü atema Hombar nikongdang Delhi nung tongti ketdangsertem senden ka menogo.

Afghanistan nung aliba India nunger ketdangsertem airport

tashi arutettsü, iba sülen India-i anir arutsü atema tongtepratepa jembidar.

Hombarnü osangbenertem senden ka nung Afghanistan tensa indang metetdaksüdang Ministry of External Affairs (MEA)-i, India sorkari iba linük nung tatalokbatem ajak repranga dang atadar, ta metetdaksü.

MEA otongdar, Arindam Bagchi-i, "Tesüiba anogo ishika tsüngda Kabul nung security tensa kanga mejungi kümogo aser tang asenok o tejembidak mapang nunga tensa maneni melenshidar," ta metetdaksü.

"India sorkari Afghanistan nung tensa ajak repranga atadar. Mapang shia onoki iba linük nung aliba India sensotem dang tekümdangtsü osang metetdakja arudar. Onoki emergency contact numbers agütsüogo aser yangji aliba asen sensotem yaridar. Afghanistan nung aliba asen senso aikati meyipa arunüba onoki jangjaogo aser onoki parnok den tongtepratepar," ta metetdaksü.

Bagchi-isa, India sorkari Afghan Sikh aser Hindu nungertem dena maneni tongtepratepar, aser Indai-i meyipa arunertem atema India sorkari inyaksü, ta metetdaksü.

Bagchi-i ashiba agi, Hombar nungi Kabul airport nung commercial operations anenogo aser ibaji ajanga onoki timtem ajangshir.

Ano külen Hombarnü Air India-i Chicago nungi Delhi tashi senzüba tayimtsü agi Afghanistan airspace paidoktsü atema UAE kübok Sharjah adena dang aru.

Afghanistan Tir, Ashraf Ghani-i linük toktsür ajenba sülen Amongnü Taliban teloki linük yimtiba, Kabul agiogo.

Afghanistan toktsür ajentsü atema Hombarnü nisung meyirjang aika Kabul airport nung adenshia liasü.

Pegasus ken o reprangtsü atema sorkari committee ka tentettsü

New Delhi, Lurio/August 16 (Agencies): Hombarnü Centre sorkari Supreme Court dang, media osang aser melung melemi bilemba nung ajemdaker Pegasus ken o bushisüngdangtsü atema temepishiba ken otem agütsü, ta metetdaksüba den külemi iba dak sendakba ken otem reprangshitsü atema sorkari mongin committee ka tentettsü, ta metetdaksü.

Sorkari affidavit ka ajanga Supreme Court dang, "Temepishiba ken otem ajak nungji kuli kasa agüja lir; item rongnung melung melemi bilemba aser tejangja masüba media osangtem densema lir mesüra kulitem mabensa," ta metetdaksü.

Sorkarisa, Parliament nung IT Minister, Ashwini Vaishnav-i Pegasus ken o dak sendakba sangdong agütsüogo, ta metetdaksü.

Terata malitsü atema item onüktem reprangshitsü asoshi sorkari mongintemi akümba committee ka tentettsü, ta sorkari metetdaksü.

Supreme Court-i Centre sorkar dang nenoki Israel nunger spyware Pegasus amshir asü mamshiar iba telangzübaji affidavit nung

agüjang, ta tuyua liasü.

Chief Justice of India, N V Ramana-i solicitor general, Tushar Mehta dang, "Sorkari Pegasus ali asü, mesüra Pegasus amshir asü masüar temepishiba ken o benokertemi metetner. Nenoki affidavit ajanga osang tejangja agütsünüra nenoki mapang agia ibaji inyaksü akok," ta metetdakja liasü.

Taoba ita International media-i, sorkar agencies dang ang ayokba Israel nunger spyware ka amshia India nung nisung 300 dak tema phone ajanga itangiter asütsüa akok; mobile phone number 300 dak tema jangjaogo aser item rongnung tang teinyakdak minister ana, osangbener 40 shi, tongtibang opposition lenir asem, judge ka, shishilembartem aser India nung activist tem aika indang phone numbers densema lir, ta metetdakja liasü.

Nisung 300 dak tema nungji Congress lenir Rahul Gandhi, election asalentong yanglur mongin, Prashant Kishor aser Union IT Minister Ashwini Vaishnav nunger densema lir.

India nung news organisations- Hindustan Times, The Hindu, India

Today, Indian Express aser Network18 nung inyaker osangbenertem aika indang phone itdangitogo; item news organisation timbakati Defence, Home Ministry, Election Commission aser Kashmir densema onük balala nung osang bendener, ta osang proka liasü.

Centre sorkari Pegasus spyware amshia phone tap asüba nung parnoki shilem agia mali, ta metetdaksüba sülen Congress densema opposition party balalai Parliament nung iba onük nung o lemteptsü takhangba agüja aru, ajisüaka sorkari iba ya tongtibang onük ka masü, ta metetdaksü.

OFFICE OF THE CHUCHUYIMLANG IMSUR SEMPO KIDONG

P.O. Chuchuyimlang - 798614
Dist. : Mokokchung, Nagaland

TENÜNGSANG AGÜTSÜR

Putu aika Tsüngrem dang temoatsü meshia sarasadema aruba, tanü telangzüba mapang ta Tsüngrem nem tenüngsang agütsür.

Chuchuyimlang nunger Asür Tsüknungnüken aser Oditula na jabaso Wb. Temsüyangba ajanga "Union Home Ministers Medal for Excellence in Investigation 2021" Award anguba, Imsür Asor Chuchuyimlang ajanga tenüngsang agütsür. Tsüngremi anon ü wadang nung temoatsüba sudadjang ta kinunger ajaki sarasademtsür.



Kinunger tenüng nung ;
Sd/-
Lanuyanger, President
Imsür/Sempo Kidong.

Office of the Chuchuyimlang Senso Mungdang

P.O Chuchuyimlang - 798614
Dist. Mokokchung : Nagaland

TENÜNGSANG AGÜTSÜR

Chuchuyimlang Senso Mungdang ajanga teküboklen agüja aliba senso rongnungi taküm 75th buba Indian Independence day amongba mapang pei wadang aser maparen balala nung takok tulu ngua Chuchuyimlang Senso sanger nem konang tetushi tulu bener arutsü nung Chuchuyimlang Senso Mungdang ajanga tenüngsang tulu agtsür.

1. Shri. Wabang Jamir, IPS, IGP INT-1 Gujarat Police, President of India Medal Award.
2. Shri. Temsüyangba Ao, UBSI of CP Dimapur Union Home Ministers Medal Award.
3. Shri. Temsü Lkr DHO Dimapur, Governor Award.

Tsüngremi nenok taküm aser maparen ajak nung maneni len ania moajangma ta asen senso-sangeri sarasademtsür.

Sd/-
S.T. Nokdang Longkümer
President

Sd/-
S. Temsu Pongen
General Secretary

India nung ano nisung 32,937 dak Covid putet aser 417 asü

New Delhi, Lurio/August 16 (Agencies): India linük nung ano nisung 32,937 dak coronavirus putet aser iba tashidak agi shiranger 417 süogo, ta Hombarnep 8:00 ako nung Union Ministry of Health & Family Welfare-i metetdaksü. Tang linük nung coronavirus agi teshirangdakpur 3,81,947 dang kümogo aser ibaji coronavirus caseload nungi shilem 1.18 dang lir.

Tesüiba ghonda 24 tsüngda iba tashidak agi shiranger 35,909

anepogo aser tang tashi nungbo iba tashidak agi shiranger ajak senteper crore 3.14 anepogo.

Hombar tashi nung India nung Covid-19 vaccine dose crore 55 dak tema agütsüogo.

Union Health Minister, Mansukh Mandaviya-i twitter ajanga, "Otsü tasen ka yanglua India-i coronavirus vaccine dose crore 55 agütsüogo. Asenoki India nung coronavirus anema raraba tashi taitba kümdaktsüdi. Asenoki vaccine agidi," ta metetdaksü.



Meerut, August 16, 2021: Uttar Pradesh nung Class 9-12 purtem school tanaben lapoktsü melaba sülen Meerut nung kaketshirtem school-i aoba noksa nung angur.

Sri Lanka Health Minister mapa nungi anentsü



Pavithra Wanniarachchi

Colombo, Luroi/August 16 (Agencies): Sri Lanka tir-i Hombarnü health minister mapa melenshitsuogo, shibai yimjak nung Covid-19 tashidak den raratsü atema arasenba maparen aser 'magic potions' amshitsü ajungshia liasü.

Tir Gotabaya Rajapaksa office sangdong ka ajanga ashiba agi, Pavithra Wanniarachchi-i bena aliba health portfolio ya Media Minister Keheliya Rambukwella nem agütsüogo,

shiba sorkar otongdar ka lir.

Wanniarachchi ya January ita Covid-19 tashidak agi tonger intensive care nung temang anepalua liasü. Arasener kati yangluba "magic potion" ka yimjak nung ajemba den iba ya amshitsü asoshi ajungshiba sülena Wanniarachchi tashidak agi kanga mejungi atong.

Tsüngrem nisung kati la dang ayong ka nung temoatsü meshizüker aliba tzi inoktsüba ajanga linük nung wara tembangtsü ta ashiba sülen lai

November ita ayong ka nung iba tzi inokja liasü.

Taoba hopta coronavirus tashidak menatepyonga aoba süoki ia magiba atema Wanniarachchi lenisüba nung Sri Lanka health ministry kanga mejungi aitsüogo.

Health ministry mapa la nungi aginaka la maneni cabinet nungbo züngoksemer alitsü aser tir-i la nem transport ministry mapa agütsüogo.

Taoba hopta ishika tsüngda Sri Lanka nung corona agi anogo ka nung asür 150 adenogo.

Anogoshia tashidak menar 3000 dak tema jungogo aser iba ajanga mozükitem kanga kangshitepar. Sorkar health worker temi ashiba agi tashidak menartem ya asemsü agi timba asütsü.

Sorkari tashidak menatepa aoba nokdangtsü atema linük mokdanga ayutsü ayongzükba magizüki lir, saka taoba hopta tenokdangba talila agütsüogo.

Maneni cabinet menden melenshiba nung Foreign Minister Dinesh Gunawardena aser Education Minister Gamini Lakshman Peiris na mapa melentepogo.

Malaysia PM Yassin-i anir cabinet-i mapa toktsüogo

Kuala Lumpur, Luroi/August 16 (Agencies): Malaysia Ato Kilonser aser pa kübok cabinet tem ajak Hombarnü mapa nungi anenogo. Ita 17 tejakdang sorkar kumtetba sülen tang iba jenjang agiba ajanga coronavirus den rara teyalong nung yimden yimsüsüba tsütsü mepetmesü tulu adokogo.

Muhyiddin Yassin-i aniba party pusemertemi par party toktsüba sülen pai pa mapa toktsütsüba aküm aser pa ya Malaysia puti otsü nung PM mapa tatsütiba abenba PM kümogo.

Cabinet senden tatembangbuba amenba sülen arishi küm 74 tain lenir-i national palace-i oa chuba nem pa mapa nungi anenba shiti agütsü.

Science Minister Khairy Jamaluddin-i, Instagram ajanga cabinet ajungai mapa toktsüogo, ta metetdaktü.

"Linük tenzüksü atema ano khen maongka agütsüba atema nenok ajak dang kanga pelar," ta pai zülutsü.

Ato Kilonser office nung minister Mohamad Redzuan Yusof-i, AFP dang Muhyiddin-i

pa indang resignation shiti agütsüogo aser agizükogo, ta ashi.

Muhyiddin melentsüpur tang tashi mejangja, saka linük nung Covid-19 wara kanga sashia pokteter lir asünung election agitsü atema tasak asütsü.

Iba melena parliament nung majority party akümsü atema coalition sorkar ka asoshi mapang tatsüka inyakteptsü imlar.

Malaysia indang constitutional monarch-i Ato Kilonser shimmer aser MP tem timbai puasemba lenir ka shimsü atema pai asadangtsü.

Nonagenarian political party lenir Mahathir Mohamad-i aniba reformist sorkar-i küm ana sorkar mapa bena aruru chirepba sülen mepetmesü tulu adoka Muhyiddin ya taoba küm election magi-i PM aküm.

Ajisüaka sorkar kumtetli nungi par party mepetmesü nung aru aser parliament nung pai aniba party majority dak sendakba nung temulung melema aruogo. Kasa mapang nung opposition tekolakba Anwar Ibrahim-i pa kanga nongshia aruogo.

Taliban-i Afghan yimtiba agiogo; airport nung nisung pongu asü

Kabul, Luroi/August 16 (Agencies): Taliban-i Afghanistan yimtiba agir rara tembangogo aser yimjung nung lir ta sangdonger anogo ka lir Hombarnü Kabul airport nung US sepaitemi tanükba agüja embassy staff tem anizüker aoba mapang rongrong adoka nisung pongu asü.

Ajisüaka par pongu ya komasür asüar ano mejangja. Telungpur matsüngdang laor aliba yimti nungi US diplomats aser embassy staff tem mitkar indang tayimtsü ka nung anidenba mapang nüburtem iba tayimtsü bushia aoba senshidaktsütsü mechi anünglen injang khadok, ta US ketdangsür kati ashi.

Ghonda 20 dak tema tayimtsü ata alir kati ashiba agi, nisung pongu ya khasetba asü ajemsetbar mejangja.

Social media nung video prokshiba nung airport telungi aiba anasa ali nung nisung tasümgang asem liasü. Ano nisung katia tasümgang pongu nguogo, ta ashi.

Taliban ketdangsürtemi rara temogo ta sangdonger lia aser 1996 nungi 2001 tashi yimsü süa aruba telungpurtem Kabul nung tanaben ngua nüburtem tesüputepa aliba süngjemdaktsütsü asoshi osang sangdonger lia iba rongrong ya ataloker.

Islamist tem Kabul yimti-i tenokdangba kecha majurui aitba mapang Tir Ashraf Ghani linük yutsür Deobarnü jena ao aser pai azüdokshi melidaktsünür, ta shia liasü.

Taliban odongtar Suhail Shaheen-i Twitter nung ashiba agi, nisung shinga meyirutsütsü aser timtem magütsütsü asoshi



Afghanistan Tir Ashraf Ghani linük yutsür jena aoba sülen Taliban züngsemtem Kabul, Afghanistan nung aliba Afghan presidential palace (Afghan tir aliba ki) nung tangokba noksa ka yangi angur.

sepaitem nem ozümgang tesashi agüja lir.

"Takum, ki-o-jen aser konang meraksatsütsü saka mujahideen temi kumzükba ayutsü," ta pai ashi.

Küm 20 dak tema meranga inyakba aser bendanga agütsüba Afghan nübur aser Taliban temi nguogo, ta Taliban indang political office odongtar Mohammad Naeem-i osangbener dang ashi.

"Tsüngrem dang pelar, rara temogo," ta pai ashi.

Linük amokbangtsü asoshi Taliban teloki hopta ka dak tera tali agia Kabul nung tembang, kong sorkar meyong sepaitem United States aser dangartemi sen dollar billion aika indoka training agütsüba aser hadir tabu balala bendentsüba yimsa ao.

Video ka nung Taliban tanishirtem tir aliba kidang aliba nguogo.

Afghanistan nung yimli tasen tenzükba yakta tejangja angutsü, Taliban azümgmeyaka meliner aser linük balala den yimjung nung tesendaktep liner, ta Naeem-i ashi.

Taliban-i tetsürtem temeden wazükba ayutsü aser bendanger aser Afghan nung kumzükba ayutsü nangzükba lir.

Taliban-i akhi mapang ama tamangba yimsü ozümgang tesashi benoka amshitsü akok, ta Afghan nung aikati tsübur. Parnoki yimsü asüba mapang tetsürtem mapa meinyakdaktü aser aibelener long agi onset, lisü agi repa amshi aser alenseta sädaktsü.

Sorkar meyong sepaitem

bendanga agütsürtem Taliban teloki tepseter ta osangtem angashiogo, ta United Nation aser United States ajanga taoba hopta shia liasü.

Taliban ketdangsürtemibo linük tesem kecha nunga raraba osang angazükba mali, ta ashir. "Tensa junga lir. Taliban-i sorkar meyong ki-o-jen shilem 90 amokbangogo aser teraksa kecha magütsütsü shiogo," ta Taliban ketdangsür kati ashi.

Hombarnep central Kabul nung yimtung aziung-aziunga liasü aser yangji alirtem pei tarutsü tia asoshi bilema liasü.

US sepaitemi air traffic control magidang commercial tayimtsü tesüsaba nung menden angutsü asoshi Deobar aonung nisung noklang aika khu benteper airport nung adenshia

liasü.

Nisung aika tayimtsü ka nung amentsü raktepa liasü aser ali nung nisung noklang aika nungtepa liasü.

Hopta ishika tejakdang US sepaitemi Kabul nungi north tsütsü kilometer 60 shi pilar aliba Bagram nung military base tulua yutsü, anungji Afghanistan linük nungi ainshitsü asoshi Kabul indang airport ya kisung anünga Afghan nungger aika jashitepa liasü.

"America nungertemi parnok atema airport amshitsü temeden mali, par nüburtem anizüker aotsü asoshi par indang base amshila asü," ta nisung kati ashi.

US senso aser Afghan nungger par asoshi inyakertem anizüker aoba nung yariteptsü asoshi Pentagon-i Deobarnü sepaia talila 1,000 yoksem, anungji ghonda 48 tsüngta ali nung US sepaia 6,000 jungnüa akum.

Ambassador Ross Wilson densema embassy nung inyaker ajak Kabul airport tongogo, aser parnok ya timba helicopter amshia anir arua anizüker aotsü atateper aser embassy compound nungi America nungger nisan agizükogo, ta US State Department indang odongtar kati Hombarnep ashi.

France, Germany aser New Zealand densema anüolen linükkyemi par senso aser Afghan nungger mapa inyakertem anizüker aotsü atema inyakteper, ta ashi.

Facebook post ka nung Ghani-i Kabul nung alir nisung million aika lendongi aitsüba Taliban den meraratsü mechi pa linük yutsür ao, ta ashi. Tang tashi Ghani ya kong aliar mejangja.

Kohima nung NASU-i cleanliness drive ayongzük



Kohima, Luroi/August 16, 2021 (TYO): Northern Angami Students' Union (NASU) ajanga Kohima nung cleanliness drive ka ayongzük, kong NASU kübok yimtsüng 18 nungi kaketshir 349 agi iba mapatong nung shilem agiogo. Kohima jila merüka ayutsü aser iba den bendenloksema nüburttem janratema/anema lidaktsütsü nükjidong nung iba drive ayongzükka liasü, ta sangdong ka ajanga metetdaksü.

Küm nung khen merükmejuba maparen shilem ama, Hokolbarnü (13.08.2021) kaketshirtemi Dzüvürü Bridge nungi Sanuorü Bridge tashi merüktetta liasü. NASU President Aneizo Keditsu-i, ashiba agi, libajen merüka ayutsü aser yimya ka ama kaketshirtem teti iba inyakyim nung anidaktsü asoshi iba drive agitsü renem.

Keditsu-i ashiba agi, State balala nung nütsüng yongsük shilem rongnung kaketshir timba lir asünung, kaketshirtemi mera tilaka agiba ajanga merükmejuba maparen tsütsü parnoki shilem tuluka agitetsü akok.

Kima/yimdong mesüra kidang nisung kari jana indokba ngura, parnok dang jana indokba/bendenba pungdang (dustbin) amshitsü indang ashitsü asoshi kaketshirtemi tesayuba agütsütetsü akok, ta pai ashi.

Iba amala yimya melenshiba ajanga temelenshi tuluka adoktsü aser India nung dang masü, saka alima tesem ajanga nung Nagaland ya merüka aliba State ka yanglutsü lenmang lir, ta Keditsu-i teimla ka lemsatöp.

Tesüiba küm den medemdangra, taküm cleanliness drive nung NASU kübok unit talila den colony balala aser dokan kibur aikati shilem tajung agiogo.

Kohima nung yimdong merükba maparen nung, NASU nung affiliate süa alir unit 20 nung yimtsüng 18 nungi temulunger (volunteer) temi shilem agiba dak alia, Western Angami Students Union (WASU), tongti lennirtem aser Angami Students' Union (ASU) executive temi temulungtetba tulu nung iba drive mapang nungita yariogo.

Item tesem balala (Kohima district kübok) rongnungi, Kohima jila merüktetsü shima liasü, kechiyong iba jila ya State capital lir, ta Keditsu-i ashi.

"Tantsü-tambu temi mapang shia jembiba onok molung nung lir aser item o yimdangi arudang onok nümatanger. Ajiasünung, Kohima jila merükba ya pei aliba ki, ki temeküt, pei meküta aliba libajen merüka ayuba den sako; aser iba tesem merüka ayutsü asoshi onoki meranga inyaktsü," ta pai ashi.

Iba drive agiba mapang, Covid-19 mera nung anidaka volunteer ajaki tejak nembangba

mask aser teka nung glove semoker mapa inyakogo, ta Keditsu-i metetdaksü.

Yimtsüng balala nungi adenshia iba Cleanliness Drive nung shilem agia takok ngudaktsüba asoshi pai volunteer ajak dang pelaba lemsatöp. Pai ashiba agi, küm nung anaben mesüra asemen tashi iba amala drive ayongzüktsü asoshi volunteer temi tebilemba lemsatöp liasü.

Kohima Municipal Council (KMC) Administrator Lanusenla Longkumer-i iba drive tenzükja liasü. Ajak ajangzüktsü mechi, iba ama merükmejuba sentong agiba atema, lai NASU tentet nem tenüngsang agütsü.

"Asenoki iba amala nübodok mapa küm nung khen dang masü, saka ita shia ayonga inyaktsüla; aser nüburttem ajak janratema aser anema lidaktsütsü atema asenok aliba tesem ya jila temerük ka yanglutsütsüla," ta lai kaketshirtem dang ashi.

Sensopur ajaki merükmejuba inyakyimtem taküm nung yimya ka ama angazükba den inyaktsüla, ta Lanusenla-i ashi. Asen meküta aliba merüka ayutsü asoshi nüburttem dang tekümdangtsü osang sangoktsütsü nungdaker, ta lai kaketshirtem ayongzükka liasü.

Iba mapatong pelashishia agizükka, volunteer rongnung kaketshir kati, lokti ajangzüktsü asoshi yimya tajung rongnung merükmejuba inyakyim ka asütsü. Anungji, nüburttem anema alitsü asoshi merükmejuba ya tongtibang mera ka, ta lemsatöp.

Maneni, merükmejuba inyakyimtem yimya ka ama amshitsü asoshi, NASU-i kaketshirtem aser nüburttem dang iba indang tesayuba agütsütsü asoshi temulung agüja inyaktsü, ta metetdaksü.

Iba drive mapang kaketshirtemi merüktetba/bendenba janatem, jana indokba tesem tashi bener aotsü asoshi 'dumping truck' agütsüba atema Keditsu-i KMC administrator aser lar team dang pelaba lemsatöpogo, ta kasa sangdong nung shia lir.

ASLB SANGDONG

Taoba mapang (18-07-2021) metetdakja aliba ama Arangtet Tatidang 2021 Shiyim (form) agütsütsü Luroi 20, 2021 anogo tatem alitsü. Anungji Tatidang agütsünür ajaki iba anogo mesüidaktsüi Shiyim agizüktsü atema tekübok mobile number agütsür:

KMA : 8794043063
DMR : 9436430463
MKG : 9089816427.

Tanabuba nung Dissertation zülurtem aser zülutsüpür shimoksa ali iba ita tatem tashi nung ASLB office den khen tongteprateptsü metetdaksür.

Secretary,
ASLB-AC

MULUNGEN LEMSATEPER



08.06.1943 - 12.08.2021

Onoki teti meima aliba ojala **ANOKNARO** (Longkhum) shiranga alidang nungi tasü nü tashi shirnokisa ali rongsen, sarasadem aser nübu agi yariogo, nenok ajak dang kangasa pelaba lemsateper.

Ozüi nenok nem kecha meyipa agütsütsü maka, saka Tajungsang Tsüngremi nenok ajak moajang ta ozü sarasadem.

Talisa item telok aser kibongtem dang pelaba shisemer :-

1. Dr. S.C Jamir
2. Shri. Imkong L. Imchen
3. Shri. C. Apok Jamir
4. Dr. Limayanger
5. Dr. Sentikumba Imchen
6. Dr. Kilang, Mokochung
7. Shri. Arentemjen Jamir
8. Mr & Mrs. Temjenyanger (Chairman) Artang Ward, Mkg
9. Mr. Anokwaba Imchen
10. 6th NAP Commandant
11. OC, PS (I) & (II) and Staff
12. Artang Ward Yimden
13. Artang Baptist Arogo
14. Longsa Sangwar Zünga (C. Khel)
15. Samaro (Kentener Telok)

Temeim Chirnur, Semchir, Kinunger aser Anükapang.

MENUNGRA BILEMTETER



Asür Bendangmongla Ozüküm (Süngratsü)

Na iba akümlir wadang temer küm ka tanü junga aruaka onoki nü mapa tajung teti menungra bilemteter. Tanü na bilemteta kinungertemi Tsüngrem nem tenüngsang agütsür.

~ Temeim Kinungertem.

TENÜNGSANG AGÜTSÜR



"Rev. R. Waimeran Wadangtep Family Mission-i" M. Chuba Jamir aser W.I. Alemla jabaso **Shri Wabang Jamir IPS**, IGP INT-I, Gujarat-i 75th Indian Independence Day 2021 anogo nung President's Police Medal for Meritorious Service award anguba asoshi Tsüngrem tenüng asanger.

Nü wadang nung nendaka aser meranga inyakba ajanga nai ajak ajatetogo aser iba takokji kibong kija atema masü saka Naga nunger aser India songjen asoshi konang.

Tsüngremi tarutsü anogotem nung nüburttem tenzüktsü arishi talang moajangma.

Rev.R. Waimeran Wadangtep Family Mission
HQ Chuchuyimlang.



August 15, 2021 nü Secretariat Plaza, Kohima nung 75 buba Independence Day benjongmung sentong nung Kr. T. Yephthomi ajanga 'Teri Mitti' ken atenba mapang tangokba noksa nung angur.

Tokyo Paralympics terpranger medeni asayatsü

Luroi/August 16, 2021 (Agencies): Coronavirus tashidak menatepa aotsü tsübuba ajanga Tokyo Paralympics terpranger mendeni asayatsü telemtetba agiogo, ta asayamung ayongertemi Hombarnü metetdaksü.

Paralympics August 24 nü nungi tenzüka asayatsü aser linük karbo Japan tongogo aser training agidar. Ajisiüka Japan nung asendenshir tashidak kanga menatepyonga odar aser tesem trok nungbo emergency benokogo.

"Asaya reprangtsüpur marudaktsüba densema tetoktepba atema tenokdangba tesashi agütsüsü," ta asayamung ayongertem aser local aser national sorkar aser International Paralympic Committee-i külem sangdong ka ajanga metetdaksü.

Asayamung ayongertemisa, special programme ka kübok school tanur kar asaya reprangtsü atema temelaba agütsüsü, ta ashi.

Ajisüaka asayamung ayongertemi, tanurtem ya teküzmükba kübok shilem agidaktsüsü ta nenshia metetdaksüogo.

Iba telemtetba agitsü ya imlaa liasü aser Olympics mapang benokba kasa jenjang agitsü.

Japan nung corona tashidak kanga kara menatepyonga odar aser Delta variant agi animesor tawa anogo nung nisung 20,000 temadak tashidak potetogo

Tokyo aser tanga tesem pongu tashi nung state of emergency benoka lir, kong bar aser restaurant tem nung yi ayoktsü memelar aser mapanga tatakzük ka dang lapokdaksür.

Kasa tenokdangba kübok asaya ka nung nisung 5,000 dak tali nem shilem magidaktsür.

Paralympics nung taküm asayar 4,400 shi-i shilem agitsü imlar aser Olympics nung ama asayartem dak anogoshia tashidak tendangtsü aser senzusenpong nung tenokdangba balala agütsüsü.

Olympics asayaba mapang Japan nung tashidak tali menatepyonga ao saka asayamung ketdangsurtemi ashiba agi, tashidak menatepa aoba ya asaya tongibang ka dak danga sendaka maliasü.

Olympic ayongertemi asayamung mapang asayar, ketdangsur aser osangbener 540 dak coronavirus tashidak potetba metetdaksüogo. Tashidak potetertem rongnung timbaka Japan nung employee aser contractor tem liasü.

Daniil Medvedev-i ATP Toronto Masters kokogo



Luroi/August 16, 2021 (Agencies): Deobarnü ATP Toronto Masters tebur kija asaya final nung Daniil Medvedev-i 6-4, 6-3 agi America nung asayar Reilly Opelka kokogo.

World number two Russia nung asayar yagi iba asaya minute 87 nung koka liasü. Asaya nung pai aces ti ao aser Opelka indang serve asemben tashi break asüba den pa indang serve break asütsü aliba pezübenprongla kümzükta asaya. Kasa mapang nung Opelka-i unforced errors 34 menaba ajanga Medvedev nem teyari agütsü. Marat Safin-i küm 21 tejakdang iba asayamung akokba sülen Russia nung rongnungi Medvedev-i tang mezüngbuba iba asayamung kokogo. Pa Masters 1000 level final pongububa nung asayaa liasü.

"Ni asaya tenzüka mapang Masters final asayatsü bilema maliasü. Ni tangbo pongu nung asayaogo aser pezü kokogo. Ni kanga pelar aser tali tajungba asayaa asayamung tali kokner," ta Medvedev-i ashi.

Medvedev, shiba taruba hopta Cincinnati Masters nung top seed asayar asütsü, pai US nung rongnung number one asayar Opelka nem tenüngsang agüja liasü.

"Hopta tepeyong pai kanga junga asayaogo aser tatem tashi meranga asayaogo. Mezüngbuba Masters final asayatsüji temela masü. Ni mezüngbuba Canada (Montreal, 2019) nung asaya aser ni game asem dang akok," ta Medvedev-i Rafael Nadal den final asayaba bilemtetshia jembu.

Kasa mapang nung Opelka-i, asaya tenzükli nungi Medvedev-i pa amokbanger asaya ta ashi.

"Imlaa aliba ama Daniil-i kanga junga asaya. Pai aibelen memena. Asaya tetenzüklen ni pa indang serve break asütsü maongka angu ajisiüka iba ajanga asaya memelenshila ta bilemer.

"Asaya mapang mopung ona liasü anungji tashi agi züka asayatsü melara masü asü. Ni tashi agi züklokja asayaba mapang pai kanga junga agizüka liasü," ta ashi.

Syed Mushtaq Ali T20 October ita aser Ranji Trophy 2022 küm January ita asayatsü

Luroi/August 16, 2021 (Agencies): Covid-19 wara poktetba ajanga taoba season masayatetba sülen India nung domestic cricket asayamung tongtibangtiba Ranji Trophy, 2022 küm January ita asayatsü. Domestic cricket season ya September ita bio-bubble environment ka nung U-19 boys one-day asayamung; Vinoo Mankad Trophy asayaa tenzüksü.

Senior team atema BCCI-i, Syed Mushtaq Ali T20 asayamung October ita tasembuba hopta nungi tenzüka asayatsü aser iba sülen one-day Vijay Hazare Trophy asayamung November ita asayatsü sentong yanglua lir. Sentong yanglur aliba ama kecha tetsükdaksü madoki ora board-i Ranji Trophy aser U-25 games 2022 küm January ita ayongzükba asayaner. Tetsür senior aser U-25 games-a iba

mapang nung asayatsü.

Taruba season atema domestic calendar renemtsü asoshi BCCI joint secretary Jayesh George nem nongloktsüogo. July ita secretary Jay Shah-i mapanglem kabo board nem agütsüogo, saka wara pokteter aliba aser IPL mega auction aliba ajanga iba mapanglem ya melenshitsu aküm.

Taoba mapang prokshiba mapanglem nung board-i, Ranji Trophy ya November ita 16 nü nungi 2022 küm February 19 nü tashi asayatsü sentong yanglur liasü, saka tang November ita Vijay Hazare Trophy asayatsü lemtetogo. Mapanglem tasenba indang osang state association tem nem taruba hopta agütsüsü.

Indian board-i, taoba season asayamung yimya nung taküma asayatsü telemtetba agiogo, kong Elite group pongu

nung team trokrok alitsü aser tanungba team ti yagi plate group ka tentetsü. Secure bio-bubble ka yanglutsü aser team tem parnok asayatsü aliba tesemtemi mao tsüngda anogo asem jelia tashidak tendangtsü.

BCCI-isa, ICC under 19 World Cup atema asayartem shima renemshitsu asoshi U-19 asayamung mezüng ayongzükba asayatsü telemtetba agiogo. ICC under 19 World Cup ya West Indies nung 2022 küm January ita asayatsü. Wara pokteter aliba ajanga Board-i küm ka tashi junior cricket asayamung ka danga ayongzükba masayateti arudar.

BCCI-isa, züngsem pongu agi kümtetba junior selection committee ka yakta sangdongtsü. Ajisiüka U-16 asayamungbo asayatsü masayatsü tang tashi mejangjai lir.

Roger Federer temekok surgery tasembenbuba agitsü

Luroi/August 16, 2021 (Agencies): Roger Federer U.S. Open nung masayatsü aser ita ishika asaya nung shilem magitetsü, kechiyong pa temekok tachichilen surgery tasembenbuba agitsüsa kümogo. Pai ashiba agi, surgery agiba ajanga pa tanaben asayatsü atema timla tila ka agütsüsü.

Federer-i iba osang ya Deobarnü Instagram nung video osang ka ajanga lemsatetba liasü.

"Ni doctor tem kü temekok dak sendakba nung ken o asüngdangtepa aruogo, kechiyong ni grass-court season aser Wimbledon nung yirua liasü. Tia maka parnoki surgery agitsüsa akümtsü ta shiogo, anungji ni surgery agitsü lemtetogo. Ni hopta aika sadema mesenzütetsü aser iba sülen

asayatsü atema ano ita ishikabo agitsü," ta Federer-i ashi.

Arishi küm 40 tain Federer, shibai Grand Slam kija asaya 20 tashi koka lir, pai Rafael Nadal aser Novak Djokovic na den Grand Slam timtiba akokba asayar record bona lir aser pai pa joko masayatetsü akok ta shiogo, ajisiüka pa tanaben asayatetsüsa temekok anepalutsü merangtsü ta shisem.

Federer, 2020 küm February ita Australian Open asayaba sülen mezüngbuba temekok surgery agi aser iba sülen ano June ita surgery agishiba sülen küm ka dak tema masayateti liasü.

Pa taküm May ita French Open nung asaya saka asaya asem akokba sülen asayamung nung shilem magitsü telemtetba agi. Pa tesüsa taoba ita Wimbledon quarterfinals nung

tsük aser temekok yiruba ajanga Tokyo Olympics nung shilem magitetsü ta ashi.

Taküm tatembangbuba Grand Slam asayamung; U.S. Open August 30 nü nungi New York nung asayatsü. Kasa mapang nung Nadal tetsüng yirur anepaludar aser Djokovic-ia anisungzüktsü nüngdaker ta shia US Open atema renemshiba asayamungtem nung shilem magitsü telemtetba agiogo.

Federer-i, 2003 nungi 2010 tsüngda Grand Slam titles 16 akok, saka küm 40 tashi nungapai maneni kanga junga asayadar. 2017 küm pai Australian Open aser Wimbledon na akok aser 2018 kuma Australian Open koka liasü. 2019 küm pa Wimbledon final nung Djokovic-i tsükdakja liasü.

Kusal Perera dak COVID-19 tashidak putet

Luroi/August 16, 2021 (Agencies): Sri Lanka nung wicketkeeper-batsman Kusal Perera dak coronavirus tashidak putetogo, ta Sri Lanka cricket board-i Hombarnü metetdaksü. Taruba ita South Africa den limited-overs series ka asayatsü lia tang pa dak tashidak putetogo.

Perera, shiba Mongolbarnü arishi küm 31 ajungtsü, pa nem May ita 50-overs asaya nung Sri Lanka team anitsü atema maongka agüja liasü. Mapang talangka team-i junga masayateti aruba ajanga lenir meleshiba mapang pa nem iba maongka agüja liasü.

India team den limited-overs series masaya tsüngda Perera tapu yiruba ajanga masayai liasü aser tang training-i meyipa arutsü atema renemer aliba

mapang coronavirus tashidak putetba ajanga pa maneni training nung shilem magitetsüsa kümogo.

Linük health protocols dak ajemdaker pa hopta ana lokti nungi pilaa alitsü aser iba ajanga pa September 2 nü nungi tenzüka kidang South Africa den Colombo nung asayatsü aliba asayamung nung shilem agitetsü magitetsü mejangjai kümogo.

"Yashi asayartem dak tashidak tendangba mapang pa dak tashidak keta aliba puteta liasü," ta Sri Lanka Cricket-i ashi.

South Africa aser Sri Lanka na tsüngda one-day internationals asem asayatsü aser iba sülen September 10 nü nungi Twenty20 asem asayatsü renema lir.

BILEMDANGANG

"Temelenshi dak alaka kecha teti asoshi masü."